



## 山芙蓉

十月，涼涼个秋風吹起，揚尾在草坪項飛上飛下，屋側角該頭山芙蓉也開花咧！歸樹開个白淨花蕊，跔風輕輕搖搖擺擺，親像同這草黃葉落、冷清孤栖个秋天，點一盞白雪雪、光華華个電火。

該頭山芙蓉係阿姆親手種个，打早斯開白花，雪白个花皮在日頭下已打眼，錫來糖蜂同蝶上上下下，臨晝花皮會轉粉紅，像驚生个細阿姐紅紅个面頰卵，到下晝頭花又慢慢轉色，歸蕊變做深新娘色，臨暗花斯謝咧；這花一日三變，凝核自家个生命力，同佢盡靚个風情在一日當中展現，日時頭歸樹榮榮个花，鬧熱過後，結截謝幕，一屑都無留戀，伸綠葉在暗分个霞痕下、涼風肚傷心術噎。

阿姆在十五、六歲个時，跔厥細妹伴歸陣相招去遶山花，阿琴帶厥等行細路，該條泥路陋陋扣扣、路肩草當塞，好得有伴做膽共下行，無實在當驚有麼个會玄玄風對草埔肚鑽出來，斯恁泥驚驚險險行有一站咧，路正有較闊，路肩也看得著柑園、甜柿園，厥等正較放心講笑。阿琴指核前面山窩肚歸片白色帶粉紅个花樹，講該係山芙蓉花，逐個看著相賽靚緊過去，想拗幾枝花轉去看靚，歸陣細妹在該幾頭花樹下吱吱嘎嘎緊講笑、緊拗花，十分歡喜。

「喂！喂！若這兜細妹，恁無家教，做麼在這拗人个花？」一個男人面逼逼大聲喝，阿姆同這兜細妹伴嚇去嘴擊擊，毋知愛仰結煞正好，較大漢个阿珠應講：「這野生个花做麼使毋得拗？又毋係有人種个。」男人聽著越致譴，大聲罵：「這花好好在該，分眾人欣賞，若這兜無人教示个來儘採拗，分若等拗撇，別儕愛看麼个？」阿琴也應：「這花還恁多，拗幾枝嘎怕？」男人行俁來，大嫫聲咄：「哪使得恁自私，來，講看若爺哀係麼人？仰脣教出恁泥个細人？」這兜細妹嚇都面瀝青，毋敢過同佢盤嘴花，歸陣跋起腳斯走。

轉到屋家，阿姆同當無簡單正帶轉來个山芙蓉插在盥肚，看核食著水又伸開花皮靚靚个新娘色山芙蓉花，心肝肚恁：「等偌大漢咧，偌定著愛自家種山芙蓉，有機會也分別儕共下欣賞，若有人想愛，討幾枝分人也毋怕。」

阿姆五十歲開始做社區志工，同志工伴共下去關懷老人、做社區環境整理，佢正經買當多山芙蓉、野牡丹同山櫻花个花秧，湊志工伴共下種在社區大路肩，間兩三日斯去淋水、一站時間會擲草、落肥；第二年，吾等个社區春天開紅色个櫻花、熱天開吊菜色个野牡丹花、秋天，靚靚个山芙蓉斯開花咧。社區肚个人同過路个人都使得欣賞這兜花，阿姆後生時个心願，正經分佢做到咧！

作者：徐姿華

### ☆詞彙學習☆

【結截】gied` zied`：果斷堅決，毫不遲疑。

【術噎】sud` ed`：悲泣，不能成聲。

【暗分】am` fun+：傍晚時分。

【嘎怕】sa` pa`：有什麼關係。

【相賽】siong+ coi`：紛紛。

【毋怕】m` pa`：沒關係。

【盤嘴花】pan` zhoi` fa+：回嘴、拌嘴、鬥嘴。